


0
1cm
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28



浙江圖書館



浙江圖書館



浙江圖書館



浙江圖書館

皇明名臣琬琰錄卷之十七



參政胡公傳

右參政葉君墓表

左參政王公墓誌銘

右參政陸公墓誌銘

左參政趙公墓誌銘

劉涵江墓表

左參政張公行狀

右參政王公墓誌銘

浙江圖書



瑯琊王世貞續編

胡直

劉龍

孟春

周用

金賁亨

王慎中

吳惺

許宗魯



左參政黃君墓誌銘

左參政吳君墓誌銘

右參政管公墓誌銘

布政使任公墓誌銘

左參政錢公墓誌銘

左參政項公墓誌銘

左參政敖公墓誌銘

參政樂公墓誌銘

右參政陳公墓誌銘

浙江圖書館

徐階

徐階

呂本

徐階

文徵明

張鏊

俞憲

陳炯

張時徹

叅政胡公傳

胡直撰

胡克元蒲圻人兒時游白石山謁顏真卿祠嘆曰大丈夫
死國血食斯土榮名豈有既乎慨然自許登正德辛未進
士授戶部山西司主事督金盞馬房諸倉闔人谷大用者
瑾黨也嘗以門客屬公公沮辱之司徒王瓊以谷言責公
公曰官至尚書倚若為水山耶瓊大恚亟謀去之冢宰楊
一清雅知公以司徒言薄譴高郵州同知州運河故知溝
也水自諸湖入河承下流兼三十六湖之任歲春秋湖水
泛溢害諸田夏冬水涸不可田民苦之乃請倣古人溝洫
之法方一里為溝深一丈六尺廣二丈至興化而止河東

故有涵洞石閘如法脩之以時啟閉旱潦不能災民甚賴
焉州民好淫祀士女祀東嶽無忌公毀之更為文游臺祀
蘇東坡黃山谷孫莘老秦淮海四賢群諸生其中攝江都
邑事丁丑上詔侯指揮妻馬氏入宮言官諫不聽乃上
踪略曰漢選後宮家人子入侍唐納壽王妃職為亂階
上不納闈人史泰督制御服還京所過郡邑賊殺亡辜甚
衆公抗踪條其奸乞詔法司訊鞫梟史泰首都門以謝百
姓復斬臣首以謝史泰元之出位言也人人危之上寬仁
無讎人莫不賢之戊寅冬遷江西瑞州府通判明年六月
宸濠反中丞孫燧副使許達死之公自吳城聞變微服徒

步夜行旦伏間道五百里還郡守被執寮屬亡去公攝郡
事召士民泣諭之死守無貳遂請兵中丞王守仁即日具
疏上召使人榻前勞問賜食詔擢公為守偽駙馬李蕃
掠城中乃集兵謂妻黃氏曰吾與城俱亡汝善為計黃氏
泣曰君其盡忠毋以妾為念公出黃氏懷印抱女顧季子
宣及家人胡永曰事若不測妾當投井以死宣死生待父
耳公乃簡壯士盛官儀詐稱迎蕃伏兵石鼓潭擒之斬首
九十四級報至王守仁曰微胡通判瑞其不免乎守仁遂
屬以兵使備賊無西公曰濠無西意第恐東下為憂耳乃
使人聲言瑞兵十萬且至夜城西隅忽墮城中鼓譟謂瑞

兵至矣濠懼脩戰守之具甚備七月朔帥兵趨南京守仁
屬公勵壯士前戰于王家渡偽都督凌十一馳馬向公佯
却竟發一矢射死之擒賊周瑞追戰于八字腦擒殺二百
七人師次鄱陽湖南風急公曰賊衆難卒平乘風縱火可
得志或謂風無常難恃公曰討逆自天何疑哉乃與吉安
守伍文定部分將士縱火焚賊舟遂俘濠賊平始還郡黃
氏曰吾與君得生蓋天佑社稷耳元以郡承師旅之後務
在拊循為條教下諸州邑訪故老咨民利病清獄市輕僮
薄賦郊行勸課農桑賑貧恤死施藥療疾嘗裁郡中僮費
三千餘金嘉靖壬午詔以江西功授廣西右叅政總督糧

儲巡察務邊洛容邑為賊陷幾廢公復之建桂林書院買
田百畝給筆札膏燭選學官明經者為師諸生各以其經
受業焉土酋岑猛守田州以兵力自多凌轢他郡劉召者
猛逆黨也誘執都指揮孫震曰必復土目退官兵乃還震
耳或謂震輕嘗賊請釋召公曰震固易敵田州土酋得無
陰使召耶土目復官兵退召必擁震而入思恩計之晚矣
乃條首罪狀白當道督責諸帥難之不從以和召召果以
震去如其言中丞盛應期屬公曰諸帥為若言敗若深知
兵其盡力公辭不獲乙酉三月進兵擒賊將李隆禮陸利
廣脫其縛結以恩信使執召轅門贖罪當道欲至二人于

法公曰業已許之其可背乎自是餘賊多附蓋自召叛至
今十有九年矣公乃深入東蘭那地金城諸絕域經畫彊
理宣布朝廷威德奏凱還是年冬中丞姚鏌疏請征猛
天子可之鎮問計將安出公曰岑施王達為猛敗失其職
守怨猛深今若許其立功還故職則二人樂為用又使人
聲言兵千萬取田州猛必專意泗城乃使思恩堅壁撻良
三心以游兵劫其村落令猛左顧以禦思恩南寧武緣各
整兵旅待湖兵至夾攻之三面受敵猛亡能為也若餘兵
四掠以右江兵出賓州左江兵與南寧武緣合思恩兵從
後擊之賊將奔突無地歸順者猛之南屏也猛親戚在焉

猛急必遁歸順趨交趾若陰使人結其所親以啗吭之功
乃萬全策耳鎮奇之遂屬公鎮南寧湖兵至檄公監軍督
都指揮沈希儀等五將軍帥八萬分道進令曰擒猛者聽
轅門計功行賞賜千金爵一級畀其地黨惡者移兵誅之
猛懼謀不知所出裂帛書寃狀抵鎮鎮不聽六月一日公
帥兵進攻賊將陸綬號萬人敵猛男邦彥素驍勇公曰此
難以短兵接也選精騎馳射之綬五易其馬公追之殺七
十四騎而後授首邦彥逃猛果謀出奔猛婦翁歸順知州
岑璋以其女失愛於猛憾之欲得猛以為功先是公令沈
希儀等察千戶趙臣雅善璋遣臣抵璋所得與猛相讎狀

說璋擒猛自效邦彥守要害璋佯以姻故遣千人助之實
為間邦彥納之及兵擊邦彥璋千人為內應竟斬邦彥猛
奔璋招之曰事急矣願主君走歸順三四夕可至交趾猛
從之公策猛已至璋所遂以兵萬人擣歸順璋遣人持羊
酒犒師見公謝曰猛欲走安南璋擊之亡去幸緩五日當
縛至轅門乃許之璋乃給猛曰天兵已退當為君奏白寃
狀遂為跡令猛出印印之璋知猛印所置酒賀猛持醜酒
一盃進曰天兵索君急不能庇請自為計猛遂飲酒以死
璋斬其首并佩印遣使至軍門上至所分兵復斬賊將王
林等初公聞邦彥授首恐非真進隴容巢窮驗之冒瘴死

復蘇猶口授諸將兵事一十三條疾遂篤輿至橫州卒時
嘉靖五年九月二十九日知州陳克恩視其行李唯夏衣
數襲圖書盈篋發公帑殮焉士民哀之如喪考妣請立祠
大中丞石金䟽其死國事乞贈官立祠以祭詔曰胡克元
實死國事贈中奉大夫右布政使祠桂林武昌郡及邑志
互載其事云

浙江圖書館



浙江圖書館

亞中大夫四川右叅政硯莊葉君墓表

劉龍

叅政葉君良器守東昌既久循良為一時首稱竟以勤瘁
致疾上疏乞休會晉秩為河南左叅政以示優異仍蒞府
事而疾不可留乃束裝離郡待命于途未幾遷四川右
叅政其子份南京戶部主事適以公差事竣會于淮上得
侍疾以行至京口卒于舟中至是將圖襄事踵南都請予
表墓君蓋予正德癸酉京闈所舉士也辱有知己之義顧
安得辭哉君諱天球字良器硯莊其別號也世居徽之婺源
曾大父諱玄否以殷厚掌區賦領綱運人服其公大父

諱觀武平心率物鄉里稱為長者考諱兆允以子貴加贈
中憲大夫東昌知府母游氏加贈恭人生子四君其叔也
君幼穎敏讀書輒成誦見者竒之封君以其孱弱不欲事
進取年十七從仲兄天爵宰崇仁始授經學比從知寧州
遂大肆學力見推儕輩授例入太學為祭酒熊峰石公所
知曰是子當有令名尋舉京闈登進士第授戶部主事委
收太倉糧儲時有巨璫督倉豪縱君守正折之輒為漸沮
督運宣府及監倉淮陽收郡縣之輸必平其入不苛求羨
餘術已能中貴同事私創造方舟十二為浮橋以便往來
其費取諸凍河夫役民不知擾莅平在東昌為極敞之邑

積弊相承貧者稅而無田富者田而不稅賦後無藝民不
聊生君謂振之非大更張不可請于當路行文量之法得
其疆畝乃以額稅均之見田使無偏累復業至千餘戶仍
為處給耕牛以力田事歲屬大稔積逋以次皆舉巡撫王
公伯畿上有績于朝事下覈實因褒之曰學不泥古 事
適變通之宜才足經野賦稅得損益之善聞者為允獄三
三囚舊牘俱坐死君得其情為白于監司未協或規之君
曰匹婦之寃猶為旱厲况非罪而殺三人且以媚人吾不
忍也竟平反之郡多淫祠野刹俗恣為惑惑悉令毀之以其
材葺理學宮作興人材施從其厚士皆奮力于學先是郡

守常秉燭理簿書君總持大綱嚴而有體委任寮屬各因其才故不勞而治事封君及游恭人得其歡心侍疾躬調湯藥衣不解帶居喪哀毀盡禮處兄弟怡怡如也平生雅愛讀書公退即手不釋卷所為詩文自成機軸未嘗蹈襲前人其於吏事飾以儒雅與世俗殊絕子份官南都嘗寓書戒之曰吾無他長惟當官三事守之不敢失耳勗哉吾子及疾亟亟份在側問所欲言徐者務脫削為開誠諭之率戒十之七八亦帖然不以怨監居庸倉適武廟北巡供億不訾檄召旁午戶部持議未決君馳至為大司徒東滹石公畫策力言行之卒致上供不缺費亦不濫人以為難

一日道出榆河值乘輿奄至無所以避伏謁道左為驕
士所詰俄有旨釋之蓋軍中咸重君之幹濟有以上聞故
爾比還轉員外郎繼遷郎中又為大司徒紫泉揚公委重
會武廟南巡軍務方殷災報日至餉給多艱惟君籌取
決尋陞東昌知府郡當要衝所轄廣遠加以荐荒倉廩空
虛下軍即事綏輯倣常平法行之民恃以安居兩月章
聖皇太后自郅北上或以前途共具移君踵行君曰聖母
將以儉教天下有司乃崇侈厲民罪也為省其半卒亦無
他作團甲法每數十戶為一團擇民有行義者總之稽其
丁業出入嚴甚於是土著益固新附日增游惰無所容矣

郡縣徭役必躬為審定務適其平強宗巨族不得幸免境
內稱便嘗遇大歉流民集郡城者日千計君度倉儲未足
自出俸給銀易粟乃勸富民并發倉儲賑之為粥以食甦
羸活二萬餘口累疏剴切奏免夏稅三之一秋糧四之一
時論躋之孝武渡當陸路之衝濟者咸以曰死生有命汝
能盡心報國吾且瞑目卒以嘉靖丁亥七月十四日距其
生成化庚子八月五日四十有八娶汪氏玉山縣丞厚之
女加封恭人子一即份孫男一孫女二份以己丑五月二
十五日葬邑之來安鎮後山之原蓋新阡也予昔校君文
謂得佳士君歷官治行果不負予舉予因籍以喜乃齋志

未究其用尤深惜之然生子如戶部方以偉器振響于時
可謂有後天其懋哉發君之所未盡者乎書以俟之



浙江圖書館



浙江圖書館

山東左叅政王公墓誌銘

亥

孟春撰

嘉靖辛卯冬拾壹月拾有陸日山東布政使司左叅政王
公卒於家謹按狀公姓王氏諱珰字邦器別號西溪世為
澤之陽城人自幼厚重不凡長承庭訓習舉業補邑庠生
聰穎過人一時儒者咸推讓之累科不利場屋公志益篤
弘治戊午以書經領山西鄉薦己未登進士試政刑曹丁
父憂守制居喪哀痛踰禮服除授戶部湖廣清吏司主事
屢承差委臨清德州居庸通太等倉監督收放糧斛所至
夙弊一清軍民悅服司農鄉鄆城侶公洪洞韓公俱一時

偉人少與可者咸以廉靜稱之三載考最獲 恩典貤封

如制丁卯太安人卒於宦邸公扶柩憂回安葬先是公以

不獲祿養父母為歎入仕即迎養母太安人於 京師曲

盡孝敬母氏熙熙然享天年終服闋陞刑部雲南司員外

郎尋陞山東司郎中時逆瑾擅權欲厲威專尚嚴刻同僚

多以酷暴逢迎公獨持正不阿法司以平恕明允稱瑾惡

之欲中傷未幾公獨陞陝西按察司僉事時川陝用兵總督

軍務左都御史洪公累聞公賢能即取軍前贊畫多致克

捷洪公甚重之瑾事敗調河南按察司僉事分巡汝寧道

值巨賊劉六等作亂擁眾數萬雲擾中州勢甚猖獗逼近

汝城人皆危懼况有

宗藩在汝尤為可慮公殫厥心力

為捍衛之計又恐人心不齊有悞大事乃集衆誓曰賊徒

雖衆皆逆天道逆天者亡汝輩無懼也我奉命來守此

邦死生與汝輩共之衆皆感激願出死力以戰遂大克捷

俘斬甚衆降者千餘人大遭挫却奔潰孤城賴以保全

宗藩以免震驚衆欲慶功公曰賊雖挫魁首尚在若不急

請天兵勦除非特汝城難保恐中原亦未可保也遂密

遣人具奏疏入天子震怒亟命將出師王師甫至屢

致克捷雖曰官軍之力公調度之功居多公又廉知賊黨

趙秀為汝人其母久禁獄中即釋之秀聞之感泣思報適

賊首趙璠等殺人與劉六等會兵秀急走報公公督率部下官軍追襲一舍地盡皆擒獲并金帛之物解送軍門節該湖河貳省撫按總督軍務左都御史彭公報云獨守孤城屢抗巨賊其功尤為可嘉等語時紀功官吳玉榮者志向卑污意欲納賄公曰竭力圖報盡職也納賄要名欺罔也吾何敢欺耶公遂不錄同事將官皆蒙陞賞有差公止蒙欽賞白金綵段銀牌等物以旌其勞勩畧無怨尤意無何紀功官以賍敗公功雖不錄大節愈張禦寇有碑後鑑有錄百世不能泯也甲戌陞山東按察司副使奉勅整飭密雲等處兵備兼管永平等衛所州縣屯田詞訟公

盡心謁力為之地方有賴丙子薊州歲荒公發倉廩賑濟
活數萬人時虜寇把兒孫帥帥象犯邊殺害叅將等官公謀
同巡撫按鎮守等奉命討平撫按憲臣交章論薦兩蒙
欽賞絲幣白金等物戊寅復進山東布政司左叅政分
守遼海東寧道公以誠信撫之除奸革弊境內肅然時有
海西夷人進貢道經開原守將誣執為賊盜撲殺報功
聖天子明察專官按覈公承勘據實回報撫鎮俱累罪公
以剛正不撓之氣遇事無所回互人多忌之公曰知進知
退天之道也吾以布衣致位已三品腰金衣紫到此足矣
遂解組以歸公忠孝剛正本於天性傷父早逝常懷風木

之悲迎母宦邸曲盡孝敬之道今大冢宰襄垣劉公為編
脩時與公為同年約諸縉紳皆以榮壽詩章為賀處兄弟
友愛篤之至鄉人以孝友稱許又嘗創建祠堂以奉四代神
主此尤其孝之大者退休林下十年杜門不出雖鄉飲盛
典有司屢躬敦請辭謝不赴不為人囑託一毫公事有司
自敬重之享年七十有五嗚呼若公者可謂生順死安烈
丈夫矣

明故大中大夫浙江布政使司右叅政陸公墓誌銘

周用

公諱鰲字鎮鄉一字騰霄姓陸氏蘇之吳江人高祖雙孫
會祖進以農業其家考祥介而好義累贈中憲大夫浙江
温州府知府母龐氏累封大恭人公少從中憲役於京師
遭家坎壈世業日湮弘治初中憲卒公侍太恭人以居稍
長就學從故少保濮陽李公受詩中弘治乙卯順天府鄉
試壬戌第進士授湖廣荊州府推官廉勤明法人以不寃
知府雅不善視同僚顧獨信愛公事必相可否然後行會
給事中御史使楚檄公閱錢穀施州施州民雜夷獠不可責以

法久矣公曰茲非有官者之事乎即日以往剗絕宿弊猶
日治其滯訟比去軍民咸以為此公於我有恩攝府事一
年凡無留牘歲當慮囚即市曹白巡按御史為之停刑者
六人具得申雪累以上官命決疑獄諸郡三年陞工部都
水司主事管徐州百步洪省夫役錢築石隄以便引船九
幾千丈正德間逆瑾方專橫政特苛黷同年給事中按事
淮安府事訖而返道及於徐自經於舟中知府誣公知其
由以自解公徐曰事回不可以偽為爾也不為辯事聞驗
之卒無實會御史缺改福建道監察御史督京師東路盜
賊明年巡山海關遂劾巡撫都御史之不舉職者因疏籌

邊三事悉見采納。繼陳六事不報。巡按河南鎮守太監王
某聞公至戒其下曰。陸御史來矣。既至奪宣武等衛屯田
為勢家所據者六千餘頃。給諸貧軍。歲增糧四萬石。正德
六年以來北方流賊所在相扇。盜起有司得所脅從。輒坐
以死而犯者益衆。公盡釋之。仍令官府勿聽以他事相攻
訐者。於是人情大安。奏釋各府滯獄百數人。辯死刑之誣
者六十人。監河南鄉試。河南稱近科得人。以是年為盛。明
年擢知溫州府。始至民多訟。公曰。所以致訟者由求簡訟
之速爾。夫長民者一切不問民則何以輸其情。乃蚤夜聽
斷。不為輟期月。視始至殆損訟牒之什六七。器辨者稍稍

就田畝吏俛首受成無所緣以為姦乃廣學舍集諸生講
解程日試藝鹿城書院第以高下彬彬成材台處寧紹歲
饑流亡集府之境內為給粥仰以活者無慮千數裁省鄉
飲祭祀公事之外諸所無名冗費民困大紓温州瀕海阻
山絕商販荒政廢不講公令願贖罪以穀者聽三年穀且
盈八萬豪民徐姓專持有司短長民以為害前官莫敢何
問公召寘之法民間生女輒不舉公嚴設禁諭婚姻第各
稱其家俗以一變甯府城三千丈覆以石省歲所費不貲
又闢通衢臨鴈池以息火患其餘事事規畫莫不長久可
行御史每行郡至溫一宿輒起曰温州殆無所事在溫六年

陞浙江布政司右叅政督糧儲是浙之東西素狎公之政

時

不煩而集初布政司以金衢嚴慶四府歲凶議減盤石衛
糧價輸之温州府庫者比其出納也或謂府官操其贏軍
中以為信至是風聞言官論其事公方行縣即日歸吳江
巡按御史數使人趣還公歎曰鴻飛冥冥弋人何慕焉竟
不可彊公早孤羈旅于京師奮志學問一時所與交游皆
以文章知名當時往往先後登顯仕故公起家即署至方
面人稱善資於師女性坦易不立崖岸與人交傾洽無吝
情復慷慨重義節敷歷中外二十年足迹不一及權貴之
門其為推官時有李都御史謫戍邊路出荊州時禁方嚴

公與魯無一面識就逆旅慰籍備至遺以俸所得二十金
以行其在河南奏祠正德間嬰成拒賊死事上蔡知縣霍
恩等五人溫州江心寺孤嶼故有宋文文山祠歲久而圯
葺而擴之民士大慰居常每以中憲不及祿養為恨事太
恭人曲盡孝敬居喪一以禮與其配畢恭人相待如賓白
首無間言諸子業經學懔懔教以忠孝勤儉自浙中歸始
治先世遺業不事侈靡亦不為矯飾自號釣雲散人約諸
士大夫為生日會作堂曰半間扁榻所曰勗齋以見素志
家居越十五年是為嘉靖丙申七月十一日公燕客客去
沐浴已逮寢遽呼諸子環視之無所語翹然而逝公生於

成化癸巳五月二十八日壽六十有四子三長希旦次希
奭俱太學生次希望女二長適吳縣賀承道叅議泰子次
適王子木都御史哲子孫男應奎縣學生應登餘幼孫女
一希旦卜以某年月日葬公于縣之珠字園先塋乃述公
行實政蹟為之狀手書戒人走五百里抵予于南京曰先
公進士同年吳郡總七人而先公又辱與公為同邑知先
公者宜莫如公敢乞銘藏之墓余受而讀之其辭慎其志
衰其事覈旋旋乎不忘其先人之訓益可以知公之平生
也已乃按狀誌之而系以銘曰 中憲之先遐哉德門孰
嗣其慶公惟後昆射策于廷矯翰以騫贊刑于荆民以不

寃執簡中臺數稱平反稍遷大藩政視於溫既樹之法載
煦之恩行成毀隨人之為言言則有瑕我則無怨吳江之
瀆水端木蕃在公孝思是惟本原不寃寃其施詔之子孫何
以徵之斯銘之存

浙江圖書

四川布政司左叅政趙公墓誌銘

金賁亨撰

公諱淵字弘道初授行人時闈豎竊柄君請改教職便養弗許庚午奉使金陵事竣請告家食者數載甲戌復任不樂就臺諫乃請使楚隨遷右司副便道歸省轉左未幾復遷司正部檄薦至辛巳始就職五十日出補四川按察司僉事按蜀不崇威不獵譽滌寃蘇困表俗化夷孜孜如弗逮嘗攝學政數月而士之好進者不爭向義者感悅明年癸未監察御史陳察揚材薦改督貴州學事察士之貧且賢者從而衣食之其惰弗率者簿罰而告誡之嘗云聖人

謂柔遠人柔之為言不可不深味也乙酉遷雲南布政司
左叅議守洱海時征廣西猛寇君介兩省間整兵食屬防
禦區畫井卒賴以成功有武定土舍鳳朝明者以其母命
匪正而弗從也於是子母昆弟迭相構仇震擾邊境官府
莫敢誰何奏牘公餘積十餘年不結撫按以屬君乃毅然
往諭不衛尺兵明疑走匿以其幼子隨千弓出謁弓皆引
滿君笑而附之欵諭利害俾反而來其父明猶弗至君復
深入千弓佯發君安坐若無人焉明乃出復階下惟君命
唯唯始得以情法土俗議處胥恃以寧人謂君有子儀單
騎之風事聞凡兩受白金之賜君念父鶴翁年耄力請休

致當道薦以大用凡八疏丁亥遷江西學校副使便道歸
省越明年始之任江右素多明達士君拔藝之餘廉察志
行拔其尤聚諸白鹿洞相與講明晦翁遺教時或徜徉廬
阜尋濂溪故迹想像光風霽月之懷謂象山當時喻義喻利
之說真學者入門第一步特舉以發諸生一時俊彥翕然
向風會南道有信浮言劾君者聞之笑曰是豈誣我耶乃
相吾歸耳越三日丁祀畢遂申前疏浩然而東居無何
遷四川左叅政復兩疏乞休弗允復起之蜀乃首建正學
書院以祀遜志方先生君自為記居數月父鶴翁訃音至
朝聞夕發兼程抵家躡踊幾絕奉柩居涇山食糲啖蔬三

年不入私室既免喪薦剡日至勸駕益勤而所樂不存終
莫之奪也君夙病癱丁酉歲發益甚遂不是年八月十二
日距成化癸卯得年五十有五嗚呼痛哉君修髯隆準舉
目成威而天性長厚望之若峻就之可親二弟異母曲意
取歡諸姪早孤撫迪尤至處宗族姻故情禮周洽而恒若
不足焉橫逆突加不怒而告以有過則惕焉自訟若無所
容其身不以己長先物而聞人一善則樂道之若不能及
或遇嘉賓客賢子孫談世故語道理則竟日忘疲或遇田
夫野人笑坐林麓若不知有軒冕蚤崇名節攻文詞作大
書及聞濂洛風音頓自歛束靜居體玩默若有得而省躬

克己希賢求益之心進進未已惜乎天不假之年也嘗謂
程門惟龜山善涵養克己須上蔡欵合二家精粹語刻之
尤好玩易欵以所自得錄遺後人皆未及也惟所著詩文
若干篇藏于家

浙江圖書館



浙江圖書館

河南參政劉涵江墓表

友仁

王慎中撰

嗚呼予何忍表劉涵江公墓哉辛丑歲予與公同罷河南
參政予方倨侮自恣馳書於公約遊淇水王屋太少二室
武當山相攜而歸公艱然徑歸且報書曰君報罷猶出內
批孰不知為權重人所為如吾誰當為明者吾歸矣不能
從君遊且宦其土方見罷而又往遊焉得毋太作意乎予
時已至淇上徜徉百泉蘇門之間愧公之言徑趨安陽訪
故學士崔後渠先生談數日亦遂歸不復至孟子洛陽矣
嗟乎公達人也既已歸矣何必使人知其為誰所為者而

公報予書其言如彼公平生約已守官儉薄瘠苦獨躡人所難要欲以見於世而今猥與不肖同罷宜其不能忘也嗚呼悲夫予何忍表公墓哉然公以沒世予卒以悲故不為文誰當明公者予又何得不表公墓也劉氏故蒲之涵頭人祖均長仕元為漳浦縣尉因家之當文廟時有仕為宿州知州名觀者有能吏名實公高祖再傳為封南京禮部郎中公淵公之父也即中公娶封宜人周氏公名友仁字是成原所由徙故號涵江以示不忘其始以正德甲戌進士始授南京戶部主事轉禮部主客郎中遷知黃州府以母喪去職起為衡州以材調廣州遷湖廣布政司左參

政遭卽中公憂起復為浙江右參政調河南參政撫民南
陽其為戶部嘗監淮安權稅及持節往使湖廣理賦督發
其滯逋以填京庾權稅故毛細易汙為之者往往矯厲苛
核皦其跡以冀自免督賦所臨遇皆藩郡大吏至者輒弛
懈不欲急懼見為觸公在淮安尤簡易與商為便督賦故
嚴密劬剔滲匿不以藩郡尊鉅為忌二事以集竟免汙跡
亦卒未嘗有所觸黃州江漢經流之衝民感政煩前守日
夜治文書應賓客寢食不得休衡州在山谷深奧處田野
饒足郡中嘗暇豫因習為偷公兩易其俗為張置為黃州
政每聞尋周瑜破曹孟德故處酌酒弔之與客泛舟娑娑

甚適日與諸生考論術業第其得失獎飭之文用大振比
公去而以文奮為時名流者項背相踵皆公所教士也衡
州置郡南嶽之下顧未嘗一遊而設約束布條教起民之
窳雖在郡日少恩施未洽而精采有加焉湖廣浙江參政
主督版冊財計而南陽主撫民公之為皆有體人謂治版
冊財計宜為米鹽公獨踈目濶節顧絕無漏失撫流逋多
以寬捨致安集而稽察誅賞公用之不少貸唐鄧之間益
用和懷其所治各有以自得如此而其尤難在廣州嶺南
五廣民衆莫如廣州且據會省部使者藩臬監司所治人
性各殊難於齊調郡於其時賢貴人在朝最有權望鄉里

多附麗之者強則折而弱則靡公持其間而免焉盖其尤
難也公平生廉謹自好居官所至不以細如毫毛或苟而
有取其於人不為苟予性尤濶直朴率無機數曲節既無
以買名譽寄援汲而居官輒得賢聲官輒起由其廉謹不
取雖有憎怒者不能加點而然也然在浙江為言者所論
在河南未幾卒以罷歸則以寡聘遺簡迎將雖其廉謹而
終不足以勝憎怒者之勢也嗚呼其可歎也夫公歿二年
既塋其子祥鶴持其族昆約齋中丞公之銘謁予曰願有
以明先君者予主廣東辛卯試事公屬在廣州共事院中
留都主客為即覽壁中陷記摩娑題名得講風美最後同

扶輿林二山中丞公之

為河南參政又同罷也其言宜可信於是為表於其墓曰
有以自待者必不託於人於人無所託則其享於世者亦
不能遂彼所謂自待者皆矯強驚卓恃已而卑物竒跡以
驚衆其不能遂意於世固其自待者所自召與公誠無所
託於人而任質徑情貌恂而詞幅非期與人為異有所戰
薄於才驚聲角之場者所遇竟若此何也豈材與不材之
間固其所難處耶然公終始所尚無少異而始見為賢終
以得罷予又以感夫世尚之變蓋三十餘年之間而仕者
見容之難易其可覩矣

廣東左叅政張公行狀

吳惺撰

公諱懷字德珍幼聰慧穎異勤學善記過目輒不忘正德
丙子公以儒士領浙江鄉薦第一會試丁丑第十五戊寅
授禮部主客司主事減四夷銜價送考貞皇太后梓宮葬
茂陵己卯諫武宗皇帝南巡罰跪午門五日廷杖三十罰
俸六月皇工入繼大統錄遺忠以勵人心公得進階加俸
庚辰陞精膳員外郎封贈父母及妻辛巳署郎中減奏新
增供應議革高手廚役一千二百名時論韙之甲申六年
考滿加贈父母兩宮覃恩頒賜誥命議大禮建室執奏罰

俸一月又議大禮改稱皇考聖母伏闕廷杖三十辛巳會

試充供給官修實錄出館與宴乙酉陞江西左參議監兌

吳城龍窟總部南京倉米軍民兩便燒造世廟龍鳳瓶罐

一萬二千件先此任事者皆降黜公毅然任之官民不擾

悉當上意仍獎勞為繳還先任四巡撫未完批申批詞三

百餘紙止行見在新卷清理由糧賑濟饑民均徭新增議

處健訟務抑豪強追還夏桂州舊估委王親逆產巡撫陳

洪謨梁材周廣御史徐岱交章保舉巡按朱彥特薦堪任

提學戊子陞廣東左叅政徧巡僻遠瘴鄉簡別應朝賢否

禁公私索擾驛遞減有司拽舡人夫撫處徭徭隄備海賊

督採珍珠半留東莞黑艚百隻哨守地方取回布政二司
扶轎民壯百名革退鄉宦徭編皂隸立各府均徭均平規
則問革貪污知縣六員巡按邵幽特薦謹畏守法節俗愛
民孜孜職業僚友犯而不較度量尤不可及辛卯三年考
滿離任中途聞江西建昌刁民王榮奏知州夏良勝刊刻
邪書非毀大禮行江西提問夏良勝先任文選郎中凡有
奏疏名曰銓司存稿建昌知府鄭源渙命工鋟刻之存稿
內有吏部尚書喬宇一本劾張璉桂萼心術奸邪學術頗
僻不當超陞翰林學士等語此亦夏良勝代筆也鄭源渙
應朝入京以此書分送時張桂二公見為宰輔見而啣之

適有王榮之奏遂行江西巡按勘問擬夏良勝充軍鄭源
渙降一級鄭源渙仍供攀舊任叅議張懷曾分付刻此書
公復回廣御史吳麟問擬鈴束不嚴贖米還職都御史汪
鋹覆叅阿附奉欽依冠帶閑住時壬辰七月也公侃侃剛
直之性乃受誣阿附不竟所施惜哉自此家居三十餘年
事母以孝處昆弟以和惟杜門著書作詩足跡亦不入官
府布衣蔬食督耕飯牛如寒士然處鄉隣宗婭言遜禮恭
一無所競居官常俸之外絲毫不妄取居家不受官府餽
遺不役府縣舡輜其清白一節終始不變真可以質鬼神
而無愧者十與鄉飲為大賓兩經科道王獻芝薦起不赴

又奉詔准致仕夫公以孤寒登高第博學宏材世所罕有
文足稱矣蒞官清慎居家孝友接物謙和行可法矣兩叩
天闕瀕死愈厲恪恭職業不避權勢忠則盡矣立心誠篤
持已儉約終始一節信不渝矣公於四教皆無愧焉殆為
天下之完璧乎公生於弘治丙午十二月初四日卒於嘉
靖辛酉五月十三享年七十有六

浙江



浙江圖書館

亞中大夫山西等處承宣布政使司左叅政南澧王

公墓誌銘

獻

許宗魯

咸陽王生道正將獎其父南澧公其弟道直狀行請銘狀
載事蹟幾萬言余乃撮其大者為志而銘之志曰南澧者
用世才也諸所履歷底有成勛其有裨於治無右於修復
海運之功然其忌於人而棄於時者皆坐是余故詳焉始
南澧由御史晉山東按察副使巡察海道謂其政莫先於
海運者其為議曰 國家定鼎上游漕運為重會通河建
萬世之通利海運備一時之權宜二者可相須而不可偏
廢也承安習故似若不急思患豫防顧不為首務哉弭節

之日備閱圖志延問耆老乃得元人之故道以及膠萊之
新河嘆曰嗟呼海運之方我知之矣夫自安東放舟遵海
而行靈山峙其西浮山勞山介其東薛島陳島石礁林立
橫浮海中險阻難越故元人放洋自三沙以達登州西北
至于海倉又北浮於渤海始達于直沽避此險也然牽輓
之勞雖節而漂溺之患亦多故丘文莊有說聞者惑焉以
余觀之夫自薛島之西為馬濠其涯為膠之麻灣北為新
河又北為掖之海倉其地里至僅三百耳若徑于此諸險
皆脫元人常治此道遇石而止今若因地為工鑿馬濠以
抵麻灣濬新河以趨海倉良便乃以事宣請于制使聞于

朝廷議于司空皆報曰可檄下從事議者紛然南澧直任
不謝昌言曰天下無不可舉之事亦無不可成之功民可
與樂成難與圖始苟能足國裕民吾負謗奚恤於是擇吏
授規諏日即事警告靈神督戒有衆斤斧肆力火烈具舉
馬濠之石焚如而燼海水流匯麻灣以通河渠奏工矣計
其延十有四里其廣八尋有奇其深半之於是江淮之舟
達於膠萊官不費財民不知勞公私賴焉計其經始及於
底勸凡三閱月耳土人德之立石頌功已而復事新河之
役濬淤夷險立防以蓄洩浮梁以濟渡設吏以司守規畫
垂成即有山西之命於時制使䟽請衆庶輓留不報而去

河工由之中廢論者惜之先時工作寮友有不協者移書
紛更南澧舉措不問其人術之速其居憂於家乃嗾言者
誣以妄興海運迄無成功疏奏報罷南澧復嘆曰嗟乎事
之成敗在天人之出處有命吾何庸心哉然海運必當復
萬全之謀必不可忽吾死不敢易此念也更箸說以告世
人噫其亦見定而守固者歟既數年臺諫論薦休廢首列
南澧亦以海道被諛而言是公論之不沒也南澧筮仕為
御史分曹南臺持憲不阿論奏不詭其請釋 大禮諸放
臣及論罷南都添設鎮守二疏尤為人所稱說初使山西
清理軍伍稽察案牘究心所事即行陣克足淹弊釐革其

再按山西也時值荐饑且罹虜患下車即請帑施賑民籍
以生乃其周邊方之處置而武備修急學校之教養而士
風振別部吏之臧否而官常飾嚴府庾之會計而錢穀裕
諸所設施憲度斬斬其決 晉藩襲封之疑以杜爭端升
潞安州治為府以弭宿患尤人所推論者總其先後論列
皆經國遠猷裕民至計若崇 聖學設總制繩黃內侍之
違法劾席尚書之庇私糾常都御史之怠事叅郭武定之
侈僭種種多故海內想望其風采詳載家傳志不悉云按
王氏之先出於渭南蒼頭鎮諱舜卿者選守文武陵寢徙
居畢郢原下遂為咸陽人有諱珪者 國初為官寮然皆

譜牒無考不可論其世次至諱十者生子士榮士榮生整
整生才初授散官封文林郎江西道監察御史加贈中憲
大夫山東按察司副使配岳氏封孺人加贈恭人其子即
南澧也諱獻字惟臣以居澧渭之汭自號南澧成化丁未
正月二十七日誕生于家少有美質長則偉軀玉立識見
超越初受學於邑人劉君到十三能文提學虎谷王先生
試補縣學生員監從司徒近山劉先生員外郎忠齋董先
生受易學又從內翰漢陂王先生受史學及為古文詞賦
學成程於有司輒居上第正德丙子舉鄉試嘉靖癸未登
進士甲申授南京江西道監察御史丙戌奉 敕清軍山

西戊子考績 敕進階文林郎封其父如其官其母及配
馮氏俱封孺人己丑丁外艱辛卯服闋改授北臺山東道
職如故是歲巡按山西癸巳復命職司臺政巡視京營
叅預考覈侍經筵 欽賜御製諸詩無逸豳風碑文并大
學衍義乙未陞山東按察司副使職司海道會上上 尊
號父得加贈如其官母妻皆封恭人己亥陞山西布政司
左叅政庚子春便道歸省未幾江內艱是秋抱病家居辛
丑春坐論居閑丁未秋七月二十四日大命允終壽甲子
而竒一戊申十一月之朔葬九嶷山陽畢郢原南澧有子
二人長即道正監生取張氏次即道直舉人取張氏監察

御史締之女隘聘柳氏孫男子三人淑田淑頤淑止孫女
子六人曾孫女子一人南澧性寬惠而操貞方有教家之
政有用世之畧有居鄉之譽余自為諸生時友其人知之
為素每歎其才不究用也銘以闡之其為世道計耶詞曰
轟耳之音聽者悸奪目之采視者蔽震代之績論者忌從
古則然今何異耶行則奚翊止亦何凡不維其躬維其治
耶我懷世矣但其喟矣

湖廣左叅政龍津黃君墓誌銘

焯

徐階

往予在延平所與遊者兩人君及諫議劔溪鄭君是也鄭君為人慷慨尚志節而君冲夷簡遠有脩然之度兩人者其氣味不相類然皆與予好也其後予督學江西鄭君卒今予幸登朝而君以嘉靖丁未二月七日年六十五卒自予去延平至於今十四年耳而兩人者相繼淪沒夫兩人者予所冀以為且復用者也而皆已不可作予寧能無泫然哉君諱焯字子昭龍津其號延平之南平人其世系具予所為君考貞孝先生表中君生三十年舉正德甲戌

進士拜南京禮部精膳主事滿三載封貞孝如其官母吳
太安人迎養之宦卽己卯寧慶人叛謀言將犯金陵勢張
甚君入再拜言曰兒有官賊至當死大夫其行矣於是家
人盡哭君終不色變辛巳遷儀制卽中貴人子入太學後
期繫治之如法嘉靖未遷知永州州人情不事耕作其
親死輒破產飯僧及無以葬則舉而委諸野尤耻貧賤苟
貧賤矣女子雖己字舍之他適苟富貴有氣力卽往往奪
人妻君至痛繩之以絕故事有司用兵九溪諸蠻費皆自
民出而卽有鹽引錢率給私使君悉歛貯之曰以是供軍
饗後遂不敢有盜鹽引錢者九疑相傳有舜塚為置祀田

設守者二人作濂溪先生祠關東山書院聚博士弟子教
之又廩孝子陽成章貢之州人以是知學庚寅遷湖廣左
叅政會其使病君攝事再踰月名聲出使上人咸望君為
真而君素不能飾言貌以悅於世數曰吾幸有親在得歸
效一日之養足矣壬辰遂致其事葺觀物園奉親讀書其
間朋舊過從破崖岸與之接及有所請屬輒拂衣而起蓋
予與君遊三年未嘗見君言之及私也予是以敬君而往
來於觀物益習君亦不予鄙遣其子諸前後受學焉今其丰
神面目猶宛然見之而身則既卒且葬矣君平生喜為詩
文所著有尊美堂政錄五卷修來編 卷中庸讀法 卷

貽光堂集

卷五 葬以某年某月某日墓在某山之原子男

三應春配鄧安人出應林應詔側室孫出皆庠生生女二
長出鄧安人嫁庠生楊繼周次出側室張尚幼孫男二期
升期昂女四君將卒顧言曰必請少湖子銘嗚呼君固以
予為知己可托以不朽也夫銘曰
嗟嗟黃君遂葬此玉
毀劔埋誰實使吾儕海內凡有幾十四年間兩人死由今
準後可知矣我諾銘君悲曷已

浙江

明故廣東布政司左叅政南岑吳君墓誌銘

徐階

吳氏故汴人宋時有諱崇本者從高宗南渡始占籍浙之
錢唐至國初子昌以貲徙實京師其子孫仍家於浙閱
三世誠為右副都御史贈其大父原敬父士寧如其官謹
義授承事郎以子貴贈奉政大夫廣東按察僉事其妻莫
與其側室周贈皆宜人族乃益大顯君諱玘字汝瑩別號
南岑舉嘉靖癸未進士拜行人司行人歷司副刑部員外
郎廣東按察僉事副使布政司左布政贈其父大夫者也
始大夫三娶無子年五十七周宜人乃生君故君最愛於

父母然於問學不督而能弱冠為諸生名蔚然起方伯夏
公延置師席時輿論古今人賢不肖及事成敗有幸不幸
語甚相合引為忘年交在刑部時嘗同考順天鄉試其所
為文章諸老先生自謂弗及故海內知君能文然君固知
兵習吏事為員外摘挾姦隱平釋冤滯精練以敏大廷尉
讀君獄詞必曰吾故知非吳員外不能為其所治囚即罪
死無號呼不平者為僉事飭兵崩南蒐士卒立保伍明法
令察盜所出沒根披苗蕪境以大寧連寇作督師征之殺
二千餘人降千餘人清遠峽險以多盜以卒六百人鑿山
三十里為梁二十有一舟用得挽以濟為副使籍民舟之

賈於海者什五為綱紀約寇至共擊之其去為盜者衆發
之不發與連坐海寇頓輯性疎爽喜調笑諧謔治園亭西
湖之濱與賓客燕遊其間若樂而忘檢者至持官奉親特
嚴以孝縣吏植柑分廨中間遺君君曰此官物吾不可
以食盡易錢輸之庫連寇平都御史

張宴具金幣勞

君固辭以免周宜人病痢剗股肉和藥血淋漓下不色痛
大夫以食芋邁疾終身其不忍食芋宦遊四方必奉像積
懸之祭則展拜以泣比病不能言數引手上指像忽自墜
其僕曰得非欲奉以行乎頷之而逝吁其可敬也已君生
成化戊戌正月二日卒嘉靖庚子六月十二日享年六十

三初君至嶺南勤於其治按行郡邑觸冒毒瘴遂患癘比
為參政會

天子有事安南治益勤既疾革猶日命吏抱文書置榻前
臥聽之故以羸卒配宜人王氏生男子二人長涵邑庠生
其次曰程泳女子二人適庠生唐守國子生朱卷皆早卒孫
男二人程朴女五人涵以

年 月 日 葬君

以廣西參議

默泉吳君狀來徵銘予與默泉皆君同年進士且相好也
遂為銘銘曰

參政耽經始以文稱詩施於其政乃匪一能出入刑官

允毅且武凡民之奸孰敢予侮與其友處傾倒嬉娛炳然
大節矩度不踰生不忘忠沒不忘孝嗟君之學孰窺其奧
生才實難誰則毀之原泉茫茫又誰起之君藏厚完魂來
安只我刻銘詩為國惜士

浙江圖書



浙江圖書館

大中大夫廣東布政使司右叅政石峯管公墓誌銘

見

呂本撰

嘉靖戊申予與石峯管公別也至辛酉丁先太夫人憂以歸不相見者凡十四年公亟來視予予見其人扶然後行欲言多未達頗訝之然體貌充腴如昔謂當痊復不意竟不起矣哀哉公子府寺奉徐憲副芝南所著狀屬予銘諸墓石予方在疚爰謝筆硯念芝南與予皆肺腑親也詎豈得獨辭哉公諱見字道夫石峯其別號也世為吾姚巨族曾祖與寧祖鑑父琳贈文林郎母蔡氏贈孺人公性稟孝友有大志髫鬣如老成人蚤失怙益力學思奮嘉靖乙酉舉於鄉明年登進士第授常州府推官公

風檢嚴峻見理速而持事堅權勢不可動搖蒞任未幾豪強斂
跡然心惟公恕寬獄多所平反春岡劉公按江南首薦之諸當
道有疑難事累年不決者必以屬公公一鞠無遁情崇明劇盜
數千人派劫瀕江州邑遠近震驚公奉操江中丞檄設策勦捕
不旋踵殲滅殆盡宜興逋負數千萬緡致縣令坐累以斃公往
視篆甫下令雖素號豪猾者無不悔罪一時輸納具足繼視武
進無錫治如宜興人稱神明焉所至尤加意學校以羨餘置學
田若干畝士類德之於是聲名籍甚撫按交薦無慮十數章壬
辰天曹徵天下良吏公治行第一擢吏科給事中公念既為
天子耳目凡閏繫國家之利害生民之休戚無不言而明於体

要必期有所濟無近名事尋轉兵科左給事中監壽陵大工時
戶工二部建議加賦以佐工費公抗疏極陳利害以為不可
上是之仍黜二卿海內陰被其澤及轉戶科都給事中以疾乞
歸已而復起補禮科嘗疏止車駕謁陵之行又條陳邊藩事宜
甚悉咸著為令辛丑正旦日食

上詔輔臣宗伯禮科至便殿議朝賀應否衆猶豫不敢決公議
朝賀宜擇日行見

皇上敬天之意上嘉允之癸卯擢廣東右叅政廣故多貨寶地
公冰蘖自勵皜然無毫髮之染無何入賀萬壽事竣以疾請解
職疏凡三上得俞旨病痊有司具奏錄用蓋異數也公既謝事

歸足跡不入公府日以睦族善隣明農教子為事時或偕知舊
觴咏琴奕徜徉山水以自適臺使屢薦起之不應方葺草堂於
峽山之間將耕釣老焉而公病奄至矣壬戌十二月二十六日
卒距生弘治辛亥九月五日享年七十有二公端重直諒視豪
貴人藐不為意念世道之頹靡思力振之苟曲徑而富貴者尤
所鄙惡公不喜殖生產家無餘貲至於兄弟宗戚有困乏者竭
力賙恤之安於澹薄自諸生居官告老無不泰然自足焉雖不
數數講學而天資近道芝南其知言哉元配戴氏封孺人年若
干歸公孝養其姑蔡務得懽心勸公篤學不分志於家累及公
為節推為給諫為叅政門以内肅然處娣姒御僮僕咸得其宜

公之賢名政譽得於孺人之助者良多公超然肥遯實孺人贊
決之尤人情之所難也已酉七月十六日卒距生弘治庚戌十
月二十五日享年六十子男三曰府官辛酉舉人娶邵氏曰海浙
江都司都指揮僉事予壻曰龐側室萬氏出聘芝南女女一適
廣信府同知史鵬之子太學生桂孫男七應爵應兆應鳳應麟
應賢應恩應明孫女一孺人先公十年葬于箕山之灣府等卜
今年正月二十七日奉公柩合窆焉於乎公立德修行蔚為世
模吾鄉出而仕處而老有不公若必舉以為勗公閔於吾鄉不
細也而今不可作矣道路之人哀之豈特吾親已哉乃銘曰
矯矯石峰人中之特位至三品未酬厥德壽逾古稀胡不滿百

爰有元配閨壺是則媲美同歸式貽慶澤箕山之陽永安玄宅
勒詞貞珉傳世千億



浙江圖書館

山東布政司參政贈光祿寺卿任公墓誌銘

環

靖三年卒

徐階撰

嘉靖癸丑倭夷寇東南于是時天下承平既久吏與民不知有兵革賊至輒奔以潰復菴任公同知蘓州獨訓練所統民兵與力戰而躬介冑策馬以先之自書其姓名於腹背手足曰死戰吾責也雖然先人之遺體不可棄也茲用以識庶得收葬焉聞者咸感泣公又與其兵同寢食或連日月粒米不入口或露宿草莽植立泥淖中未嘗稍自異所得俸直及諸上官之牢醴悉分與其兵由是亦日奮敗賊於上海之八圍方戰時寇拔劍擊公賴庖人徐珮身蔽公

以免公猶被三創既而守太倉以積勞疽發于背公子爾
孝請還郡就醫公叱曰吾誓不與賊俱生幸吾疾愈而賊
滅當與若共太平之福否則有臣死忠妻死節子死孝而
已歸以是語爾毋吾不能與婦子對泣帟榻間泯泯以沒
也會報賊至公遂裹瘡出海擊之怒濤如山南人習舟者
皆震眩失色公意氣彌厲手劍麾舟師擣之賊大敗俘斬
百餘未幾又敗之陰沙敗之保山敗之南沙賊望公旌旆
輒遁去捷聞擢山東按察司僉事整飭蘓松兵備甲寅
賊犯蘇民爭走入城聚保而門鑰不得入民相抱號哭聲
震原野公蒞曰城池百姓重等耳柰何棄之亟命啓門使

人謂其守曰賊入者某請任其責凡活數十萬人明日賊
至以計敗之封門乙卯賊復大至公復大敗之斬首

六百餘級詔進公副使賜白金文綺廕一子為潞州

衛左所副千戶世襲丁母趙夫人憂部使者及諸士民連

疏乞起公詔責公大義而特贈公母為孺人以慰公公

不得已受命明年倭寇平疏乞終制詔報可乃陞山

東布政司叅政以旌其功又明年丁嫡母張夫人憂海內

士大夫望公服闋出為國家排大難立大功而公以前勞

戊午七月初三日疾作遽卒享年僅四十於是士大夫又

莫不悲公用之未竟與朝廷之失士而蘇松之士民則

相與為祀祠

公給事中蘓人徐師曾請於上贈公光祿

寺卿然其父老猶相與言曰未足盡報云公諱環字應乾

復養其號世為潞安人生正德己卯二月十八日幼警悟

不凡年二十三舉山西庚子鄉試甲辰登進士知廣平以才

優調沙河丁父憂改滑縣沙河當南北之衝疲於役甚公

首為省厨傳罷誅求以次釋寃獄毀淫祠凡所興革必視

民所便沙民大悅及治滑如治沙語具二邑生祠記及德

政之碑辛亥徵至京師公之妹有與吳室婚者故以例佐

蘇州公為學先行誼尚名檢姪為諸生時大書壁間曰營

私者無上虧行者無親又曰克海濶天高之量養先憂後

樂之心必如是始可以言士故其歷官清貞介特迥然異
於時流而於其忠義之績在蘇松者尤著

浙江圖書館



浙江圖書館

江西布政使司左叅政贈光祿寺卿錢公墓志銘

泮

文徵明

嗚呼自倭夷為三吳患者數年鹵掠燒劫多所殺傷兵不
得休息民不得安居而常熟濱海帶湖罹禍尤慘雲江錢
公以江西叅政居憂邑中謂邑宰王公鈇曰寇既得志勢
必復來公有守土之責而吾父母之邑墳墓親戚所在忍
坐視也乃日與商畧為備禦計練女飭甲部分調遣事甫
就緒而寇猝至城下即與棄城捍禦悉衆急擊連弩繼發
寇乃遁去又明日寇自上湖北下直指讓港公謂王公曰
此可邀而擊之也部領民兵抗旌出港轉戰而前殺傷相

當俄而賊大衆掩至公麾下鳥獸散衆寡不敵公身被數
槍猶手刃三賊遂與王公死焉是乙卯五月廿又四日也
事聞 天子震悼贈公光祿卿官其子部錦衣百戶遣官
諭祭於其家嗚呼承平日久所在備弛兵興以來並海州
縣徃徃閉城自守或不發一矢而公非有官守未始受命
征討徒以桑梓之故慷慨激發摧鋒陷陣竟以身殉豈不
誠義烈也哉 公諱泮字鳴教別號雲江裔出武肅王鏐南
渡時徙居常熟之奚浦再徙綠園高祖叔平仕宣德時稽
勲主事曾祖景儀祖希直父封刑部郎中諱某母宜人褚
氏公生而凝重少無童習及長敏利好學爲文麗則而理

弱冠選隸學官里胥以高譽推長鄉賦或言學官造士例
復其身不在科謫之列公曰徃役義也吾何辭畫出應繇
暮歸讀書研經質義不以事廢遂舉甲午應天鄉試乙未
進士筮仕閩之侯官改浙之慈溪召入為刑部主事歷負
外郎郎中出守順慶陞陝西按察司副使進今官未赴以
憂歸卒年六十有二嗚呼傷哉公修政踔絕敏於剴裁試
邑侯官拊循道利民安其政屢錯維勤庶務畢舉上官材
之奏改慈溪慈溪浙省劇邑靡薄易動公嚴毅自將而誕
章敷化一如侯官擿伏省微兼以加慎在北鄙尤稱職辦
有權貴囑公寘所仇於大辟公曰附勢而殺人仁者不為

也卒讞出之邊帥執疑似數人以爲虜中姦細傳致抵死
本兵不爲異公察其非辜特爲執奏同官謂具獄不宜翻
異恐得罪不測公曰知其寃而不爲白何用法爲奏上數
人者皆得不死公折律詳明心存仁恕每多平反如此順
慶僻遠郡大而繁公久更民牧諳練法情推其緒餘以達
於庶政興學養士專務德化居若干年俗以丕厚顧城北
且癘念歆修復而重於動衆乃號召屬邑饑民厚直而使
之民既得食工亦告成及持節分陝益修兵防飭亭障謹
烽燧訓農講武令嚴政肅虜聞不敢窺塞邊庭晏然會漢
中饑汎孳屬路公即以便宜發廩賑之巡撫以兵餉非奏

不宜妄動公曰陝去京數千里必待奏發民死無遺矣矯
詔活民即得罪不恨於是所全活以萬計他郡饑民相率
盜礦擢兵嘯聚撫巡歆兵勦除公執不從曰此饑民暫此
求活非有他圖麥熟則散矣萬一猖獗某執其咎若兵興
則絕其自新之路或生他變撫巡因以屬公公檄所在官
司開倉賑民民所至隨地安集勿追其過本仍榜示使麥熟
歸農麥熟而不解即真盜矣民聞懼曰錢公實生我民民
何可負公也感投刃散去事亦救寧撫巡上其事遂有江
西之命嗚呼公駸歷中外餘二十年所至効績往往以身
殉道如此及茲死事亦其素志敢為不敬苟且自恕耳非

直避逆倖功焉也嗚呼烈哉若其家庭孝友之行端居自
守之操律身以禮接物以義高情雅致不能盡書書其大
節如此公生弘治癸丑某月某日先配徐氏繼盧氏贈封
皆宜人子男十二人長即部次郡都鄉郭祁抑鄧却昂遺
腹一子未名女五人章卿趙憫龐夢登龔文楨王繼麟吳
繼常其婿也孫男十六人與較輻輳輕輪軌軌軒輅翰輔
輻轉餘未名孫女六人嘉靖丁巳某月 日葬公邑之姚
唐里部手具事狀乞余為銘銘曰 虞麓巖巖琴沅淵淵
秀穎有鍾是生才賢烈烈錢公履貞蹈義策名 王庭出
宰百里回翔二邑侯官慈溪以翼以綏以莫不宜爰登法

比邦刑是執不苛以隨迺正而克迺言均勞罔有中外建
節秉麾寔惟簡在肅肅西征翼翼專城文教攸與邊庭用
寧烈烈錢公志貞孔武飭甲韜安孰余敢侮蠢茲醜虜犯
我鄉邑窺我城闔肆其狂逆我武再揚抗旌摧鋒保茲
墓域志翦窮凶伏鉞于征討逆用順衆寡于懸爰以身殉
海立濤崩日星晦冥山川攸攸適還厥靈嗚呼烈哉
天王有制恩沾及泉賞延于世有玄者宅姚塘之阿忠魂
在茲鬼神護呵石闕栽栽松楸鬱鬱有永貞名千祀弗沒

浙江圖書館藏



浙江圖書館

廣東等處承宣布政使司左叅政甌東項公墓誌銘

喬

南昌張鏊撰

嘉靖三十一年六月十五日廣東布政司左叅政永嘉項
公卒以又明年正月初五日塋邑之竹浦茂山之原其孤
文煥等持王君應辰侯君一麟所為狀請詞於遂按狀公
諱喬字遷之其先有諱竑者自宋居永嘉四傳至公采仕
理宗知婺州軍事子怡翁為福建提刑徙青田至文壁復
還為永嘉人曾祖昂祖淵父式封兵部職方司員外郎母
婁氏封太宜人公少嗜學稍長攻苦茹辛博習諸經傳子
史至百家無所不貫嘉靖八年舉羅洪先榜進士授南京

工部主事儀真有巨盜竄名埠甲常殺一舟子而奪其妻
者公在廠詰真之法黨與悉除調兵部武選武選之法校
黃大內弊易以滋而選籍時燬於火主者患之公一一旁
采釐正考績陞職方員外郎尋以水土不習乞改任陞南
京禮部郎中會天雷電高廟災衆懼不知所出或云宜咎
典守者公曰天心仁愛柰何及無罪導人主忘儆畏乎出
知撫州逾月調廬州廬諸所隸虛淫以賦之羨入歲之訊遺
當路咸罷革之以焦廟香資膳士築雞皮馬尾二河橋丁
毋宜人憂除補河間首擿胡撫臣不法事人以寵貴難之
公曰法耳吾不能為揣時歲飢賑貸不俟臺報輒疏聞尤

以法督所部活民甚衆轉湖廣按察司副使嘗嘗貽書數千

言止楚藩王及楚世子之弑也匿不以實聞公曰法言宗

親不實坐離間以細故也今豈細故哉力請邀奪訃書白

其狀尋以武部註誤謫福寧同知徙松江同知轉僉福建

臬事經畫屯政攝巡漳南省上抗饋給歲千金使查盤者

至橫誣其邑長公直焉嘗嘗五平巨獄不以徇監臨可否殲

白葉諸洞宿寇籍其地事聞賜白金文綺轉廣東左叅議

又轉大名女備副使河間囚搆危禍多中大吏而有望於

公訴公附和詆毀賴上聖明白此萬一倖生也亟正其罪

而釋諸所逮不治公無何選廣東左叅政分守嶺南嶺南

澤國也人恃噓渡以生恣唇吻為名勢者輒奪而主之附

以奸究取稅於墟取直於渡又縱海舶以為常而民日蹙

矣公怒曰是吏無法也即今刻日使自新然自是鮮敢犯

者撫定大羅徃犵芟博羅羅浮通賊二百餘人蠲闔闔夜

卒兩廣藩憲舊襲韓軍門伏謂之禮公曰妄也反覆大辯

禮遂除公素病貽再謫官一繫禁獄懼然骨立在嶺南忘

夕食寢瘴厲侵耗行部至韶竟以疾卒廣之人奔走匍匐

而哭其賢者尤哀之始政府張文忠公欲甄公翰林及銓

諫要職皆不就且曰明欲云荅主上必搜舉海內英俊又必

純心以為之本因五上書大要用賢下士審識行藏進退

之義今大學士徐公秉銓屬公落職乃延之上座傾倒公
曰盛德柰何卒無一詞退䟽時賢五十人謝之初守廬僚
佐弗堪者作謗書有嬖倖方士言吾能析上威譴治此輩
公曰彼自謗耳吾何以憤為不應恒言居官毋避勢毋恤
怨嫌興利毋大祛害毋細又曰藩臬之體在嚴守令以惠
民嘗嘗艱斥二郡守一倅一令之無良而援貴近者推敬賢
師友所至興學引後進多名士又與諸大賢君子同志摩
切曰聖賢之學不愧天人豪傑之志不在温飽其臨政治
民至於燕獨未嘗釋書左右印證曰此吾事即吾心也其
所得者粹然正矣其為文大沛力肆下筆立就窮極天道

人事而執於仁義所著有甌東私錄文錄政錄若干卷自

謗官後僅以家童自隨平生未嘗置媵妾常俸之外蕭然

無長物遇故素之喪必賻表節孝存儒碩嗣祀尤多居家

篤愛諸弟姪年六十配宜人張氏子男三文煥文蔚俱學

生文言尚幼子女一未適孫男九繼祖先祖守祖順祖敬

祖念祖繩祖憶祖儀祖公之行志於墓譜於家此特其表

然而大者蓋永嘉人文盛矣今不及百年有文忠公以相

業焯顯而負譽望風節毅然大丈夫則又有若公蓋竝為

天下名賢也鑿夙以官序待公受知益敬為之銘曰項在

南宋聞人嗣踵後三百年德幽以永克大厥宗自甌東公

公奮其學仕不苟同七歷藩郡厥有民功以義裁物一其
初終屢蹈其奮氣剛以克自我直躬孰闕其逢甌江之滸
偉矣元輔媿美者公名哲攸鍾勞施不竟民之無幸有德
有文貽厥後昆士有休矩風節其崇刻詞不朽永光墓門

浙江圖



浙江圖書館

明故大中大夫山東布政使司左叅政蒙泉敖公墓誌

銘

璠

俞憲

古人定交以盛衰存亡為節而敦本植倫之士必以此自
考見云余自始進持服家居則聞浙中有恤刑而賢者為
即中教君及後上天官補刑部即則又聞署中有恤刑而
賢者為即中教君時君固為即中恤刑浙中也余恨不及
見既君以恤刑竣事還署署中故事僚長貳自公式之外
一以齒序進退別坐次而容色言語不免其所以長長貳
貳者存乎其間君獨脫去凡習表外一誠無所以長長貳
貳者存乎其間以故僚友多就之初君常物色余意余或

魁岸奇辟要眇闊畧不可近而余以嘗嘗知君故方傾心君

君覘之積旬日乃信余而定交也居三年君遷兵備副使

去余亦尋罹罪譴而君兵備太倉州太倉州與吳錫近邑

往來必過余其容色言語加于余者忘其為遷人也余亦

自忘為遷人與君上下議論握手嘆時事如在署中時不

意別且五年而君逝矣嗚呼余忍銘君墓哉比余貳臬江

西君之子應期來乞銘泣曰昔吾父與公別也不謂公至

吾楚及公至吾楚不謂吾父不及見惟公無忘吾父也而

為之銘嗚呼吾忍忘君乎哉君居官穎達博裕而不為魁

呀奇僻之行明潔貞毅而不為要眇濶畧之談所至能任

大事持大體頗不為浮俗是非利害所奪初還署會言官
論順天鄉試不公法當治無何又有論甲辰榜大臣不當
私其子者天子屢下詔按其事君如詔會僚友按治之自
侍從而下逮捕者凡若干人中外恟恟有悸色中官叵測
上意又日令徒校持手版旁記所按狀以待上問諸曹有
色動者君按之自如也有詞臣不受訊者竟訊之有御史
不受繫者竟繫之諸所承伏悉其實以報報兩上天子以
為平也悉是之茲役也持以疑似得洗雪者先後凡若干人
觀於此而君之任大事持大體槩可知已署中故清約至
不能具茗供故事辦之筦庫者或因而浸淫其費則筦庫

者又因尅^而取歲報之美餘以充君憤曰非法也且知其弊

而遂巡之與自尅取等耳乃下禁而更與僚友約月出俸

錢以給湯茗之費之不可已者君于財利雖微必慎如此

君既兵備太倉州不逾月州獄失守逸要囚四十餘囚入

海且為亂君不白當道亟發兵捕之而海賊素馳突又倚

新因為援勢張甚君既撲滅之不妄戮一人先是江防都

御史曾具疏請兵兵不及發而平賊之疏上于是天子嘉

其功錫以金幣君以非大賚賜不敢辭乃以幣衣其母而

以金易田一鍾用貽榮于其後人君按太倉州不專尚嚴

而恃法一如署中余邑有兄交訟者連數歲不能解君將

置之法其人聞之星馳數百金造君廬求君之弟而浸漬
馬弟乃厲聲叱之令亟去不去且縛于官其人亟還因以
告其鄉人而余親聞之于其人者也嗚呼此非操履素定
即吾心有不能自信者况兄弟乎又在千百里外非啻暮
夜抵門可以自決者也君之平生於此可想見矣君諱璠
字貴之自號蒙泉居士江西臨江之新喻人按狀君世居
新喻水北里曾大父俊大父啟父方齋翁義方齋翁以君
貴增承德郎刑部主事母盧氏封安人盧氏蚤多疾常一
夕夢赤日麗空天人捧冠袍送童子入室中而君生焉君
生果聰警異常歲乙亥年十歲補郡弟子戊子領鄉薦乙

未進士第丙申授刑部福建司主事己亥陞山東司員外
郎庚子陞河南司郎中辛丑奉勅恤刑浙中癸卯還署即
余回官時也甲辰陞山東按察司副使奉勅整飭蘓松等
處兵備住劄太倉州戊申陞山東布政司左叅政己酉丁
廬夫人憂歸新喻君舊病疴每憂勞過輒發其居安人喪
也哀過輒發及安人葬適徂暑且哀勞過輒又發既闋服
逾月而疴大發遂卒寔嘉靖辛亥八月二十一日也距其
生為弘治庚申十月十九日享年五十有二配吳氏贈安
人繼配余氏封如吳子男四人長即應期配庠生錢勲女
次應元君命後仲弟珂聘國子生簡符女俱郡庠生次應

良聘國子生黎伯思女應詔未聘女三人長適晏金勉次
適庠生黃尚次幼孫女一亦幼君卒之明年壬子應期等
卜以十一月十二日塋君于里克睦灣嗚呼蒙泉顧止于
是哉余觀君貌朴而神完心和而德厚將必有大行廣施
遠猷豐烈茂祉祺壽以符其所謂謂天人之兆者而今已矣嗚
呼傷哉昔君在署中吏事事稀濶僚友率相對為清談君
每及家事多稱老母老妣云窺其意無時不在堂闈寢食
前也君又友于兄弟君大父別業在隣邑寧鄉君悉以畀
其弟珂守之而家計則付之季弟曠若不知己之有子也
而應期輩亦欣欣相忘焉珂即前卻訟人金者不幸先君

卒今應期兄弟咸蒸蒸嚮學又璜為之幹樂于外其必能
相扶植以成君志無疑也然則君之厚乃蓄而蓄于流以
終天人之兆而收其效者其有待于後人矣乎余見應期
如見君恍然有不勝其存忘之感者乃揜淚而為之銘銘
曰維君之學孝友敦朴維君之仕庶敏勤確中道云亡哲
人之傷有子承之天人之祥感君交誼盛衰一致余之報
君存亡敢貳陸灣之阡冠袍儼然系銘于石友道弗愆

叅政樂公墓誌銘

都御史陳垺撰

公諱護字鳴殷木亭其別號也公自幼穎異絕倫書過目
成誦弘治戊午以詩中江西鄉試壬戌中會試乙丑賜同
進士出明身年授宣城知縣初至值歲歉道殣相望而郡中
督逋方急公與民約秋熟來輸即以情自白於郡罷追之
至期果上納無爽積年逋負一旦盡完先是民若饑相聚
為盜劫掠無虛日公知其故單騎徑詣村落中曲加撫諭
賊衆喜曰父母未矣何以生我相與感泣而散公遂遍歷
各村咨訪疾苦計口類冊歸即發廩賑濟置大牌數十面

上書鄉貫序列十餘里民以次由南門入既給粟從北門
而出絕無停番浸冒之苦甚得賑濟良法公善聽訟剖決
如流庭無留事傍疑獄監司多以委公公虛心聽察務得
其情太平鄉民有甲乙素友善戲相搏擊乙誤中甲乙歸
語故而妻與所私者夜遂殺甲誣乙抵死臺檄公覆視之
公細閱案牘見甲兩耳後重傷悟曰豈有傷重若此不即
死而能歸家至夜始絕耶此必同謀故殺誣人以便已私
者也召甲妻詰之具得其狀伏辜乙得免死其他平反多
類是

武皇時群璫柄用貪夫憑威炤載楮幣鬻東南諸群守令

悉歛民錢厚值償之公獨弗禮丁卯入

觀京

師中遇盜

途

發公笥止得四十金盜相顧愕又見公

巾服麓敝詢知為公嘆曰久聞宣城有樂天乃汝耶還金

音

而去蓋公在縣廉明表著宣民拊之曰樂青天云已巳丁

丙艱去任服闋補山陽知縣當江淮總道官舟往來絡

繹額派丁夫牽輓公選義民督之舟無留行大省請謁餽

遺之費民使之賊劉六等四出流劫將及淮南公積儲治

器預為防禦漕運張公侍郎陸公彭公相繼督重兵至軍

需器械取具倉卒公皆立辦湊集民無擾焉三公多其才

能文章薦公徵拜南京戶科給事中在諫垣敢論天下事

前後章疏十數上其曰保躬罷皇店正名分端好尚新
士習皆回家根本計當是時嬖臣錢寧導

上巡遊怠萬機弗理勢焰熏灼能立中人奇禍公力言久
之不少諱而奉賢能糾亮墨即桑梓之邦必及焉 乾清
宮災公奏請實脩省以應天變言尤凱切京師稱爲鉄漢
具載家集時父方所公年逾九十就養南都公屢疏乞送
還鄉比歸一年而方所公沒三年喪畢公無意復出築室
東鄉田間有終焉之志今上登極用言者薦起為光祿寺
少卿以公善天文兼領欽天監事公澹泊不見好居長安
中若吏隱然未嘗一至權貴之門少師石齋楊公少傅鵞

湖費公宗伯石潭汪公皆雅慕公名先至公署公惟遣人
投刺致謝而已公又屢疏請勵精以贊天道脩德以承天
眷每因占候力陳脩省他如明時月正曆法皆超覽絕識
卓有定時而曆家相沿既久難於更革公亦屢疏乞休不
允時五星聚室公建言忤

圖

旨又因事劾奏宰臣宰臣銜之屬官能馬者以私憾公遂
乘機誣奏公下公錦衣衛獄大臣力辯其誣得釋左選宿
州知州即日執道不謝所知履任不逾月致其仕而去又
二年家宰西樵方公司馬靜菴胡公薦才堪治郡特起公
大名知府公初至時方盛暑公念獄中淹滯苦當何如乃

悉出獄囚。迹下一一訊之。輕者放免。重者請於監司。次第發遣。公尤勤政。質明起。眈事宵分。方息。居政敦大務。以德化。故民不威而自服。嗣後訟簡。清罔固。數月。虛曠幾至。罷守郡。有譙鐘相傳。魏大武時所鑄。守清正則鐘聲。洪亮。否則不揚。前守惡之。棄於通衢。鍾因半裂。適歲歉。民兢言。神物棄置。為咎。請復之。公曰。有是哉。祭而懸之。扣之不揚。公不悅。忽夢大衆喧集。為鍾解。包既而扣之。鍾果洪亮。其裂處尋一平滿。更擁起一脊。民益異之。歲己丑。吏部考公治行為天下第一。尋超遷陝西布政司叅政。督理糧儲。又奉命搞邊。具有成績。居無何。引疾乞休。得允。以禮致仕。戊戌。

冢宰松臯許公又特薦公再起河南叅政

上幸承天公分守河北奉

旨整理渡河舟楫而行宮火公而職事被逮隨蒙

恩旨免歸公自是得以適意林泉時與田夫野老相親狎

蓄薪蒸修陂堰建橋梁以利益鄉人顧於家事不屑經

意產業僅給衣食而已公襟懷夷曠善為詩歌意興所至

頃刻立就殊有盛唐風韻每賓朋過從輒命酒高歌動由

真率言吐肝膈悠然物我相忘古人風致蓋可覩矣公府

事絕口不談晚年雖縉紳過訪悉以憊病辭謝鮮得見其

面焉公平生敏達之才卓越之識忠直之節循良之政清

苦之操切實之孝孝友之行可為純備而又窮達一致始
終不渝豈不謂之盛德大君子哉嘉靖四十二年陽月晦
日卒享年九十所著有木亭雜稿三十卷梓行於世

浙江圖書館

明故進階嘉議大夫資治尹前貴州布政使司右
叅政棟塘陳公墓志銘

張時徹

棟塘公之與余遊也蓋齒長一紀以上不余藐也而驩之
既歸耕海上去之六百餘里乃尺書之訊不絕靡衷弗吐誠
其心有所慕悅也公居常曾微霜露之疾恒語其子曰兒
知余平生石矣乎亦知海內有學士先生乎司馬哉司馬
哉我死志我銘我必以公非是弗之瞑矣比續之屬也猶
諄、語如昔云乃其子敬則跣而匍匐至余草廬長跼泣
曰先子有命土未敢掩也敢以謁諸侍者余款款出涕曰
於乎余忍聞此言哉既受狀讀之曰於乎余幸而後死也

余忍負此言哉按狀安吉之陳莫詳所自始始自八一府
唐元六傳至五府君瓊生七府君滿字守謙則公父也隱
德弗耀里中稱為質行長者以公貴贈承德郎刑部雲南
司主事妣都氏贈安人公生甫十月而承德公即世太安
人自夫曰所不立孤嗣其宗務罔以從夫君於地下茹荼
銜血備諸百罹易理粥以俎豆課誦肄以斷機即嚴父不
啻也年及有司以狀聞朝廷下詔旌表如甲令事具大宗伯
二泉邵公大司馬浚川王公誌表及全懿堂集中公諱良
謨字忠夫讀書棟塘園中因署為號學者尊稱之曰棟塘
先生云公稟質奇異不允兒時即嶄二雄其頭角十歲為

屬野偶能詩謔嘗作鷄雛失世行長老覽而異之十三補
邑弟子員試輒冠其曹自是研精易學文日名于群中而
檢身飾行行々若處子非其人_不交非其地不履出入里
市目無流視里兒不敢狎也嘗護月公府 諸生率躄踞而
戲公獨屹然長跽甚肅也邑令龍居陰伺得之詰朝語於
衆曰子_子之穉也而不墮行于冥冥他日必為國器矣間從
儕輩飲酣暢即譁譁四起公獨正襟危坐終席不愆於儀
衆因呼為板陳云正德庚午舉於鄉辛未下第歸諸士爭
執經受業公講藝迪德多所振厲彬彬有稱矣丁丑舉進
士尋告歸省戊寅而太安人永訣若天相其哀者當是時

孺慕毀瘠不能興服闋猶廬墓側將終身焉親知力勸
之出癸未始出比至國門或私之曰例行矣稍需之科道
可得也公弗為應竟授工部都水司主事治泉徂徠徂徠
諸水會於南旺漕艘經焉而權貴人及閹宦徃來如織啟
閉自由水不得涸舟日以膠公至峻為之防非令至不得
啟非舟盡不閉即尊官巨鎗弗有假也由是謗議騰沸時
有謝給事者上章劾之會衆論右公而謝蒙誚讓詘焉泰
安泗水等州縣額僉置城諸所壩夫凡八百餘名以供濬
築其實無所事而客役者不便率倩近壩遊手代之費
浮繇金者數倍公乃建議罷役各徵金二兩以備河工公

私利焉並泉各植柳以固隄歲粥枯槁凡若干金泉夫有
迹殺者計日輸罰亦若干金前政恒私之公盡從罷免暇
則延進諸生析經課文植其不立諸生用興于學相繼登
進若太宰吳公嶽憲副吳君孟祺則其高第弟子也丙戌
滿考調刑部雲南司乞南改禮部祠祭司轉兵部車駕司
員外郎刑部江西司郎中操執甚毅識鞠明信所書獄詞
象莫易也戚畹有王勇者恃寵橫甚嘗道梓潼御史會以
訟入部輒戢手語侵尚書尚書第唯唯遣出而心甚銜之
乃以雷公公即按法捕繫論如律一城駭然轉禮部儀制
司辛卯為應天同考該官凡得名士三十七人壬辰陞湖廣

布政司右叅議提督太和山蕪分守荆南威惠並行條章
具飭吏民莫有梗者

文廟時詔以近山膏壤召佃以供道流而輕其公稅道流
以是日富而詭寄者逾象州民大困有司稍欲通融則提
督者輒尼不行公慨然曰佃戶州民均吾赤子也一肥一
瘠如平政何乃議人復一丁而賦其餘田如州民之半兩
俱安之故事佃人於朔望例其有供饋又以柴薪納價者
八百名以官地徵子粒若干石復於官帑支香錢金百四十
以充供具若常俸然者公悉捐之每行縣輒飭厨傳毋得
兼味而辭舍封閉甚嚴即累月不通一菜一魚也同事中

貴人憚其風采乃以珍物介數百金為蓋餽之也公怒鞭
其使者且欲疏諸朝中貴人窘凡三及弟門頓首請謝乃
已甲午陞福建按察司副使決遣滯獄多所平反豪宗墨
吏莫不嚴之丁酉陞貴州布政司右叅政行至辰沅忽念
曰凡所為仕者以宣猷展采樹尺寸以報主耳此之不得
而徒卑之祿仕何為哉即不能治生雪上之田不猶有可
畊者乎遂上疏乞骸骨不待報而時歸年五十七耳居無
何現風使者若舒御史汀高御史懋北臺趙御史炳熙相
繼論薦極其褒揚卒不起然海內名流推為冠冕若浚川
王公大司寇容庵應公大司空南垣劉公大宗伯潯陽董

公譽德贊履其言總總非浮之為諛也公長身玉立貌甚
癯而雙目炯炯如鑑風神瀟灑望之知為塵外人也天性至
孝恒以弗及承德公為恨念至則蘇蘇隕涕不已事太安
人色養備至一舉足而不敢忘歲時享祀致存致慤如將
見之每伏地嗚咽久而後起公於人無所不愛而尤篤於
近親族子曉少孤無依則收而子之為之營產授室族女
貧不能字復收而女之長擇名家子嫁之則衛學生朱大
器也公自少有志聖賢之學從游井泉湛先生之門及與
呂涇野鄒東廓薛中離諸公締同志之盟其學一以存誠
為主務於自得雅不喜立門戶騰口說以徼時譽平居非

甚疾病未嘗一日廢書不觀作詩文耻為鈎棘語而溫純
雅澆盛為藝林所推其與人不可畦畛見之者無賢愚少
長皆驩然意滿而親賢取善嗜若飢渴每得忠諫䟽草及
高賢論撰必裒錄而誦之蓋其誠好之也家故食貧比抽
簪勇決空橐以歸曾無卒歲之儲或至不給賓祭困矣而
夷然安之一介未嘗妄取曰彼披裘負薪不拾遺金者何
如人哉室廬輿馬服食器用惟所有之安一切世俗所競
而馳者不屑也慈祥樂易寬而容衆專以濟人利物為念
雖臧獲童穉咸厚恤其私孜孜赴人之急惟恐不及受人
施即織芥不忘報施於人雖過為之所弗有德也人有一

善亟稱揚之惟恐弗聞有過則力為掩覆必諷之使改而後已要皆至誠惻怛出之自然非以樹恩賈譽也晚節造詣益深收歛益固以故行年九十而志慮不衰下筆數百言立就舒指通意斐然可誦其答余手書具在可徵也居常坐不倚席行不俛杖歲時伏臘終燕不疲遇所善客則談說竟日以膏繼晷人卜之曰若是其康也眉壽未有艾也而乃遽厭世長逝鄉里失其典刑後學失其荅蔡惜哉公嘗署其書室云弄丸餘暇閑來往觀化逍遙任去留至其邁疾也却醫藥弗御彌留顧子女無一但化語神氣惺惺弗亂蓋於死生之際達矣所著有天目山房存稿山房

摘稿和陶小稿見聞紀訓彙纂要族譜凡若干卷藏於
家初娶朱氏贈安人繼娶嚴氏封安人皆先卒無出副室
黎氏生子二長敬則歲貢娶新昌縣知縣張君翀女次孝
則州學生娶中書舍人沈君汝立女皆能以文學行誼世
其家女二長適嚴汝礪次適吳彥衡皆太學生孫男四長
弘濟次弘瀚次弘漑皆州學生次弘浹孫女一曾孫男六
長從渠次從臬餘尚幼曾孫女二公生於成化壬寅二月
二十九日卒於隆慶壬申三月二十三日得年九十有一
無何有司以賢行聞于督學使者祀之學宮墓在鳳亭鄉
平日山之陽左去承德公塋域十餘武蓋公八十時所豫


治者或以堪輿家言勸之改卜則却之曰吾幸考終得尺
尺從先人遊不勝大願忍遠去耶此可以觀志墓以某年
月日

銘曰胡為乎結綠而不以圭璋胡為乎豫章而不以棟梁


胡為乎飲水為列鼎而緼袍為袞裳嗟嗟乎若公者其逃

名之休伯耶其化俗之庚桑耶天日蒼蒼若水洋洋何斯

寧斯有封若堂



浙江





浙江圖書館



浙江圖書館



浙江圖書館

浙江圖書館善本


甲登記號：006675

一九 年 月 日



浙江圖書館

colorchecker CLASSIC





















xrite



mm

colorchecker CLASSIC



x-rite

100mm